

宋代詔令全集

學術顧問 曾棗莊 劉琳
主編 王智勇 王蓉貴

第九冊



四川大學出版社

本書出版得到國家古籍整理出版專項經費資助
國家「二一」工程重點學科建設項目
四川省哲學社會科學「十五」研究項目

宋代詔令全集

主編 王智勇 王蓉貴

▲
第九冊
▼



四川大學出版社

宋代詔令全集卷四四八

官吏拜罷

褒恤 一

贈韓通中書令詔

建隆元年正月戊申〔一〕

易姓受命，王者所以應期；臨難不苟，人臣所以全節。故周天平軍節度、檢校太尉、同中書門下平章事、侍衛親軍馬步軍副指揮使韓通，振迹戎伍，委質前朝，彰灼茂功，踐更勇爵。夙定交於霸府，遂接武於和門，艱險共嘗，情好尤篤。朕以三靈眷佑，百姓樂推，言念元勳，將加殊寵，蒼黃遇害，良用愴然。可贈中書令，以禮收葬，遣高品梁令珍護喪事。《宋史》卷四八四《韓通傳》。

【異文】

雍正《山西通志》卷一八三：「易姓受命，王者所以徇至公；臨難不苟，人臣所以明大節。周故天平軍節度使、檢校太尉、同中書門下平章事、侍衛親軍馬步軍副都指揮使韓通，定交霸府，委質前朝，荷戈共歷於艱貞，錫壤迭分於戎律。朕以三靈眷祐，百姓樂推，言念元勳，方疇異渥，蒼皇遇害，良用愴然。追升浴鳳之池，式表潛龍之舊。」

歸葬高防賜高延緒詔

乾德元年十二月

爾父有幹蠱之才，懷匪躬之節，朕所倚毗。遽茲淪亡，聞之蠹傷，不能自己。矧素尚清白，諒無餘貲，殯殮所須，特宜優恤。今遣供奉官陳彥珣部署歸葬西洛，凡所費用，並從官給。《續資治通鑑長編》卷四。

冊贈孟昶爲尚書令追封楚王文

乾德三年七月二十四日

四日

維乾德三年，歲次乙丑，七月己巳朔，二十四日戊子〔一〕，皇帝若曰：咨爾故檢校太師兼中書令、秦國公孟昶：夫冊贈之典，所以彰世祚而紀勳伐；繼絕之義，所以旌異域而表來庭。苟匪全功，寧兼二者。國家乘乾撫運，括地開圖，稽至德於勳華，體深仁於湯禹。既定壺關之亂，復剪淮夷之凶，暨荆及衡，洗蕩逋穢。以爲人君之道，先德而後刑；王者之師，有征而無戰。兵威震疊，寰宇來同。以致薄伐西川〔二〕，徂征三峽。惟爾袒襲乃堂構，據有巴庸，而能祇畏皇靈，保全宗緒，知機識變，委順圖全。馳子牟魏闕之心，奉伯禹塗山之會。朕自聞獻

〔一〕年月日據《續資治通鑑長編》卷一、《宋史》卷一《太祖紀》一補。

〔二〕「七月」以下二句：「己巳」原誤作「己未」，據《宋史》卷四七九《孟昶傳》改。然己巳朔，二十四日亦非戊子。按《宋史》卷二《太祖紀》二：乾德三年七月「壬辰，追封孟昶爲楚王」。壬辰正是二十四日，疑是。

〔三〕西：《宋史》卷四七九《孟昶傳》作「兩」。

款，良切虛懷。舟車欣至止之初，邸第錫非常之制。封崇異數，期保永年。景命不融，奄然殂謝。嗚呼！爾有及親之孝，特異常倫；爾有奉上之情，所期終養。何高穹之不朽，與幽壤以同歸！斯朕所以當寧興悲，徹縣永歎。詢於史氏，申命禮官，今遣使起復雲麾將軍、檢校太傅、右神武統軍兼御史大夫、上柱國、平昌縣開國伯、食邑七百戶孟仁贊持節，冊贈爾爲尚書令，仍追封楚王。嗚呼！式備哀榮，載光簡牒。南宮峻秩，全楚大邦，併示追崇，復超彝制。始終之分，朕無愧焉。尚冀英魂，歆茲盛禮。嗚呼哀哉！《宋朝事實》卷一七。

楊業贈太尉大同軍節度使制

雍熙三年八月辛亥

生著勤勞，執干戈而衛社；歿加賁寵，聽鼙鼓以申哀。不有追崇，曷彰茂烈！雲州觀察使楊業，誠堅金石，節茂松筠。俾塞上之威名，本山西之茂族。自昇環衛，甚著忠勞。方提貔虎之師，以效邊陲之用，群師違戾，援兵不前，獨以孤軍，陷於強敵。勁節森厲，有死不回，求之古人，何以加汝！是用舉茲徽典，旌此遺忠。魂而有靈，知我深意。可贈太尉、大同軍節度使，賜布帛千疋，粟千碩。《宋大詔令集》卷二二〇。

故左僕射致仕贈侍中沈倫可追封魯國公制

敕：追榮念舊，悼往申思，方當覃慶之辰，宜舉飾終之禮。故具官沈倫，巖廊耆德，社稷純臣，輔邦國以貞方，遺子孫以清白。儒行昭明於信史，忠規模範於搢紳，既諧止足之誠，遽起殲良之歎。徽音豈昧，慶澤宜優。龜蒙進大國之封，洙泗協漏泉之

澤。式揚嘉命，以慰英魂。《咸平集》卷二九。

故諫議大夫劉保勳可贈工部侍郎制

敕：生享顯秩，歿有追封，表君親終始之恩，彰臣子忠貞之節。況歿於王事，殲我邦良，宜因覃慶之辰，特茂飾終之典。故具官劉保勳，早登華貫，素藹嘉稱。玉崑融和粹之誠，冰壺瑩潔清之操。踐更臺閣，茂著風猷。正直表於搢紳，簡廉允於公議。洎邊朔平戎之役，見馳驅盡瘁之勞。哲人其萎，悼百身以何贖；徽章有贈，加三綬以寧忘。是用旌爾貞魂，因予大慶。冬，官亞卿之秩，可賁漏泉；勤王隕命之靈，諒歆玄澤。申恩念往，式表予懷。《咸平集》卷二九。

故淄州刺史累贈太子太師李處耘可贈侍中制

敕：國家褒贈之恩，臣子哀榮之典，式昭故實，可舉而行。故具官李處耘，忠亮事君，韜鈴立節，既荷葭莩之寵，宜增漏壤之恩。矧堂構之上言，冀琰詞之飾寵；俾列珥貂之貴，追酬露冕之榮。貞魂有知，可膺賁贈。《咸平集》卷二八。

故容州觀察使劉文裕可贈寧遠軍節度使制

端拱元年

敕：朝廷褒贈之恩，臣子哀榮之典，載稽彝訓，式表始終。

〔一〕 刺：原作「敕」，據祁本改。
〔二〕 繫年據《宋史》卷四六三《劉文裕傳》補。

具官劉文裕，輅略英才，公侯令德。稟直方之器識，茂勳績於旂常。自廉問宣風，化條綏遠，賓海著兼禰之詠，佐時圖鏤鼎之名。奄忽遽聞，悼傷寧弭！宜舉飾終之禮，用彰念往之懷。旌節之榮，藩宣之秩，俾增輝於窀穸，示追寵於明靈。真魂有知，欽茲賁飾。《咸平集》卷二八。

冊錢俶文

端拱元年八月戊寅

皇帝若曰：昊穹眷祐，賢哲挺生，稟象緯之純精，負經綸之盛業，作民父母，爲國翰垣。其存也冠中臺而長諸侯，其沒也峻徽章而崇禮命。咨爾故安時鎮國崇文耀武宣德守道功臣、武勝軍節度、鄧州管内觀察處置等使、開府儀同三司、守太師、尚書令、兼中書令、使持節鄧州諸軍事、行鄧州刺史、上柱國、鄧王、食邑九萬七千戶、食實封一萬六千九百戶、賜劍履上殿、詔書不名錢俶，嗣祖考之令德，奠東南之奧區，開國承家，本仁祖義，以忠孝而保社稷，以廉讓而化人民。勤翊戴於累朝，克惠綏於一境，世傳威略，志慕聲明。當武庫戢兵，洞閱詩書之府；洎秣陵問罪，雄張犄角之師。致區宇之同文，賴忠良之協力。逮於纂紹，益享崇高，蘊明哲而保身，務傾輸而竭節，盡獻土壤，來歸闕庭，予嘉乃功，薦錫殊寵。而道隆簡退，志尚謙沖，屢辭郤穀之權，難奪范宣之讓。朕深惟勳舊，俾就養頤，爰出殿於大邦，庶聿臻於眉壽，式繫元老，永輔眇躬。何天道之難諶，而梁木之斯壞！長沙既往，空存甲令之勳；征虜云亡，但見雲臺之像。賙賻從於異等，嗟悼廢於臨朝，寧酬柱石之勳，未極君臣之分，庸加典則，以厚始終。今遣使太中大夫、尚書工部侍郎、上

柱國、汾陽郡開國侯、食邑一千戶，賜紫金魚袋郭贊持節冊贈爾爲秦國王。嗚呼！德無不報，予敢忘於格言；魂而有知，爾尚欽於天命。嗚呼哀哉！《宋史》卷四八〇《吳越錢氏傳》。

蘇協贈秘書丞制

淳化元年十月庚申

故光祿寺丞蘇協，清白檢身，義方訓子。長才屈於下位，餘慶鍾乎後昆。其子易簡，爲吾近臣，典司密命。際會斯極，雲屏之美可期；奄忽難追，風樹之痛俄及。已舉奪情之典，合推飾壤之恩。贈以麟閣之資，慰乃蘭陔之念。可贈秘書丞。《宋大詔令集》卷二二〇。

推恩田錫詔

咸平六年十二月壬申

君臣之際，義莫重焉，在於忠賢，必厚恩禮。生既觀其亮直，歿亦極其哀榮。故右諫議大夫、史館修撰田錫，清節素高，直躬無撓。久處朝列，有端士之風；擢踐諫垣，得諍臣之體。朝夕獻其良畫，動靜貢其直言，布在封章，殆盈几案。而又効先民之述作，資乙辰之討論，愛民之誠，顛沛無已。奄茲淪沒，彌用盡傷，特越常規，以勸忠蓋。可特贈工部侍郎，以其子將作監主簿慶餘、慶遠并爲大理評事，給俸終喪。仍令布告天下。《宋大詔令集》卷二二〇。

錫周瑩謚敕〔一〕

景德四年十二月

華袞之錫，榮於生前；筆削之加，嚴於歿後。苟匪其人，曷勝其字？今故尚書、吏部侍郎、知樞密院副使、中書門下同平章政事周瑩，忠貞亮節，翼贊君心，是宜特贈爾爵，錫爾謚。贈金紫光祿大夫、賜紫緋金魚袋、太師太傅、上柱國、中書令兼尚書令。文恪錫之誥贈，永爾之榮，子孫其守，厥維欽哉！同治《上饒縣志》卷二三。

文武群臣逮事太祖朝者賜一子恩詔

大中祥符七年

三月癸巳

文武群臣逮事太祖朝者，賜一子恩，令翰林學士李維、知雜御史段曄等參驗以聞。《續資治通鑑長編》卷八二。

故贈侍中楚昭輔贈中書令制

大中祥符八年三月三日〔一〕

敕：朕昨者薦玉真區，觀風近甸，眷興王之舊壤，懷佐命之勳臣。存則懋延賞之恩，沒則峻追榮之典。具官某端介自守，沉鷺有謀。早事先朝，罄輸亮節。嘗總司夫樞務，實備竭於忠規。屬茲均慶之辰，宜霈漏泉之澤。西臺重地，右相崇資，允極哀榮，永昭幽窆。可。《文莊集》卷二。

故保平軍節度使同中書門下平章事駙馬都尉魏

咸信可贈中書令制

敕：國家褒崇密戚，傷悼茂功。中鉉聯榮，久參於眷倚；西臺正位，早極於追旌。具官某文武兼資，箕裘濟美。受勳蔭於懷衽，稟命略於庭闈。博通禮樂之原，周知教化之本。而自降嬪魯館，推轂漢壇，出總藩條，入陪鼎席，勤王之業，紀在太常，體國之忠，書於甲令。方全饗用之福，遽興愍遺之哀。特加右相之崇，用極惟親之贈。英魂不昧，尚服寵靈。可。《文莊集》卷二。

贈李漬官賜其家粟帛詔

天禧四年正月庚午〔二〕

國家念介潔之士，終保令名；舉追飾之文，用旌素履。河中府處士李漬，衣纓傳緒〔三〕，儒雅踐方，彊逸自居，恬智交養。殆茲晚節，彌紹清猷，奄及淪亡，良深軫惻。特行賁典，式慰營

〔一〕按此敕或爲偽作，當再考。

〔二〕年月日據《宋會要輯稿》儀制一二之一五補。

〔三〕正月庚午：原作「三月戊午」。按《續資治通鑑長編》卷九四於天禧三年十二月云：「是月，河中府處士李漬、陝州府處士魏野皆卒，詔各贈秘書省著作郎。」據此，贈李漬、魏野詔當在同時。《長編》并於二人卒月書贈詔事，乃史家叙事之例，非謂贈二人詔在是月。考《宋史》卷八《真宗紀》三云贈魏野詔在天禧四年正月庚午，則贈李漬詔亦當在是日。《宋史·李漬傳》但言四年春，《宋元通鑑》卷一五繫在四年正月庚午，當有所據，從之。

〔四〕衣：《宋史》卷四五七《李漬傳》、乾隆《山西通志》卷一八三等作「簪」，似是。

魂。惟蓬閣之司文，乃儒林之美秩，仍示歸生之轉，兼推給復之恩。申飭守臣，優恤其後。豈獨旌於泉壤，亦足厚於民風。可特贈秘書省校書郎〔一〕，賜其家帛二十疋，米三十斛，州縣常加存卹，二稅外免其差役。《宋大詔令集》卷二二〇。

處士魏野贈官制

天禧四年正月庚午〔二〕

國家舉旌賁之命，以耀邱園；申卹贈之恩，用慰泉壤。茲所以褒逸民而厚時俗也。故陝州城東村處士魏野，服膺德素〔三〕，刻意篇章，顧辭格之清新〔四〕，爲士流之推許，而能篤淳固之行，纂肥遁之風。頃屬時巡，嘗加聘召，懇陳誠志，願遂《考槃》。且令牧守之臣，每諭撫存之旨。忽披封奏，奄及淪亡，載惻予懷，特疏寵典。蘭臺清秩，追飾幽局，厚其賻助之資，寬以復除之令，諒惟優禮，式顯高名。魂而有知，致此殊渥〔五〕，可贈秘書省著作郎，賻其家帛二十疋，米三十斛〔六〕，州縣常加存恤，免其諸雜差徭。《宋大詔令集》卷二二〇。

故守司空兼門下侍郎平章事王欽若可贈太師中

書令制

天聖三年十一月三十日戊申〔七〕

敕：國有元老，遂階成勳。天乎難諶，曾不愍遺。特稽殊等之禮，用章虧體之哀。故具官某峻極降神，生民總秀。逮事先帝，久服大僚。勒封岱宗，偃仆師節。輔致鴻業，格於皇穹。肆予冲人，靈承景命，實賴盡規之力，紹隆累盛之基。及茲云亡，深用哀悼。尚父維師之重，周官內史之崇。并刻密章，以付幽窆。死且不朽，永賁忠魂。可。《文莊集》卷二。

寇準追復開府儀同三司太子太傅上柱國萊國公

制 明道二年三月庚寅〔八〕

敕：朕軫懷念舊，飾壤推恩，矧處宰司，嘗干吏議，久喪亡於炎微，特追錫於榮章。故將仕郎、守衡州司馬寇準，器範恢宏，材猷俊茂。歷樞機之位，升臺鼎之榮。偶失兢修，遂罹遣謫。屬頒赦令，用滌滯瑕。官傳之資，名秩尤重，復霑渥命，諒慰營魂。可追復開府儀同三司、太子太傅、萊國公。《宋大詔令集》卷二二〇。

- 〔一〕秘書省校書郎：《續資治通鑑長編》卷九四謂贈「秘書省著作郎」，按下篇《處士魏野贈官制》亦云「秘書省著作郎」，《宋史》卷四五七《李漬傳》作「秘書省著作佐郎」，則「校書郎」似誤。
- 〔二〕庚午：原作「庚子」，按是月癸丑朔，無庚子，今據《宋史》卷八《真宗紀》三改。
- 〔三〕德：《宋史》卷四五七《魏野傳》作「儒」。
- 〔四〕顧：原作「頗」，據《宋史》卷四五七《魏野傳》改。
- 〔五〕致此：「致」，《宋史》卷四五七《魏野傳》作「歆」，「此」，原作「比」，據《宋史》卷四五七《魏野傳》改。
- 〔六〕三十斛：原作「十斛」，據《宋史》卷四五七《魏野傳》改。
- 〔七〕年月日據《續資治通鑑長編》卷一〇三補。
- 〔八〕年月日據《續資治通鑑長編》卷一一二原注引《宋朝要錄》補。

曹利用追復開府儀同三司司空檢校太師兼侍

中保平軍節度使上柱國鄆國公制 明道二年三月

庚寅〔一〕

敕：夫記人之功，忘人之過，哲王令典，朕每慕之。追惟輔臣，且罹深憲，肆頒禮命，用賁營魂。故崇信軍節度副使、銀青光祿大夫、檢校左散騎常侍、兼御史大夫、上騎都尉、房州安置曹利用，早蓄壯圖，遂階撫仕。使殊鄰而交聘，克著勤庸；侍近幄以謀謨，歷居顯位。爰從吏議，再削官封。言念謫居，久淪幽壤。屢申恩而寬宥，宜追遠以軫懷。旌勳貂蟬，公槐峻秩。密章告第，式示寵榮。可。《宋大詔令集》卷二二〇。

贈楊億官賜謚詔

景祐元年四月甲午

尚德旌賢，王者之首務；竭忠謀國，君子之大方。慨三策之所藏，想九原之可作。追榮表行，宜峻常規。故翰林學士、尚書工部侍郎、知制誥楊億，性蹈誠明，文涵經緯。被遇神聖，逮事先朝。革時風之澆浮，潤皇藻之雅正。加以前職未服，處躬無從。顧名節而不違，抗朋邪而靡奪。固以爲清廟之圭璧，儒林之著龜。聲暴外裔，道冠當世。自天禧之末，政漸中違，能叶元臣，議尊儲極。方厲戴君之素，過興萎哲之悲。肆朕纂圖，緬懷遺直。嗟士類之安放，思賢範之弗忘，加秩易名，用賁泉窆。凜然英槩，尚克有承。可特贈禮部尚書，謚曰文。《宋大詔令集》卷二二〇。

故左龍武官大將軍昭州防禦使張昭遠可贈觀察

使制

敕：夫勞臣竭節，雖沒而靡渝；王者念功，既往而彌篤。所以合恩義之紀，賁哀榮之終。賁厥英雄，我有成名。具官張昭遠才謀沉鷲，姿度方嚴。練輜略之大端，席公侯而茂閎。早由差擇，遂服驅馳。洊升諸使之聯，亟攝專城之守。通知疆事，兼濟吏文。展於體以實勤，勵乃猷而克壯。比階勇爵，用領禁屯。方出倚於幹名，遽歸移於末疾。頃亦換司環衛，仍護州兵。庶臻勿藥之和，奄軫聞輦之痛。永言遺烈，深悼予懷。法賻如儀，廉車正秩。茲爲寵卹，尚克歆承。可。《宋元憲集》卷二〇。

故翰林侍講學士尚書戶部侍郎馮元可贈本曹尚

書制

敕：夫保德終譽，名臣高致；悼賢加祿，前王令典。具官馮元，性度沉簡，風猷淹素。識探聖繫之奧，文擅詞宗之華。曩踐俊科，亟膺眷顧。傳經繹義，排去異端。登庠攝職，照明羣志。進階前席之問，入直層構之嚴。肆朕升儲，實參僚案。逮於纂歷，彌資講勸。綢繆露門之學，黽勉禁林之游。或裁成信書，或總制經禮。有資必判，應鑑弗疲。頃雖常借郡章，而復進聯卿貳。貪寬中授道之益，賒壺遂倚相之期。時胡不庸，殲我皇士？

〔一〕年月日據《續資治通鑑長編》卷一一二原注引《宋朝要錄》補。

追惟往範，震於余懷。天臺設官，地版攸重。刻之密印，尚賁泉塗。魂而有知，歆此嘉寵。可。《宋元憲集》卷二二。

寇準賜謚忠愍制

景祐三年七月（一）

夫徇義保躬，賢哲罕兼其致；原心觀行，褒沮得伸其公。惟節惠之舊章，實經世之明勸。不有正議，孰旌遺烈？故開府儀同三司、太子太傅、上柱國、萊國公寇準，器資莊重，風猷簡貴，感會先聖，綢繆上司。明心若丹，直道如矢。逮余主鬯之日，實乃秉鈞之秋。圖惟協恭，罔有二事。遭盜言之噂嗜，挾危法以中傷。白璧易汙，貝錦難辨，再罹遐謫，遂及云亡。終悲零露之歸，徒軫幽泉之痛。間雖浚伸澄雪，追賁寵嘉，而誅功易名，尚闕恩禮。沈謀秘畫，淪於疑論，逝者莫愬，朕甚閔之。《謚法》有「危身奉上曰忠，佐國遭憂曰愍」，合是休典，慰其營魂。宜特賜謚曰忠愍。《寇忠愍詩集》卷首，四部叢刊本。

故耀州觀察使曹儀可贈節度使制

夫勤官盡瘁者忠之全，哀亡勸存者義之篤。矧爾帶礪之胄，方備封疆之臣。務罄一心，靡啻他用。奄遭淪謝，宜錫寵褒。具官曹儀，性資端和，世載勳烈。在昔乃祖，以德冠羣后，從享於太宮；施及而考，以力宣王家，繼仗於齋鉞。負荷宏構，屬於幹材。自階仕於班聯，實積效於勞勩。遂繇別使，入掌禁屯。兼倚列城，出固西園。比嘉控遏之重，改升廉察之權。式佇後庸，克纂先服。美志未遂，修塗已窮。戚自訃聞，實累中惻。俾正登壇之秩，尚識傳弓之謀。歸賻納書，爾或無限。可。《宋元憲集》

卷二〇。

故左班殿直楊成可贈崇儀副使制

敕：具官楊成，夙以幹名，備於煩使，序服庭臣之列，浚書官簿之勞。美尚方申，修塗早已，克鍾懿烈，可慶高閼。矧盡瘁之未圖，顧追榮而有典。內司置使，貳職參華，超爾寵名，以光幽窆。可。《宋元憲集》卷二〇。

故內殿承制魏成德可追復供備庫副使制

敕具官魏成德：早基華胄，亟列內朝。奉使指以實勤，更歲期而亦久。向緣微坐，遂免所居。方踐復圭之辭，遽迫藏舟之變。奄然不淑，良用軫懷。宜追寵於故官，俾終榮於厚窆。甄勞念往，尚或嘉茲。可。《宋元憲集》卷二〇。

曹利用謚襄悼詔

康定元年九月辛未

居寵保終，爲臣或闕其全祉；念勞恤往，有國所務於至恩。贈太師曹利用，頃事先朝，密宣忠力。當講和戎之利，寢階秉軸之榮。位不期驕，禍生所忽。終緣族子之累，遂謫房陵之行。齋恨奄殂，撫情加悼。嚮從昭洗，并復寵名，而於節惠之文，不及有司之議，宜推褒典，有飾前庸。《謚法》有「因事有功曰襄」，「恐懼徙處曰悼」，宜賜謚襄悼。《宋大詔令集》卷二二〇。

（一）景祐三年七月：《宋大詔令集》卷二二〇繫於「景祐二年七月甲申」。

故太子太師致仕任中師可贈太子太傅制

敕：義重股肱之虧，禮尊冕服之縫，務崇恩厚，取究哀榮。

矧聞政之舊臣，早秉鈞以陪朕，乞身未幾，復魄可嗟。追懷鵠髮之良，宜厚密章之飭。具官某，體行明潔，志慮忠純，有秉彝經哲之風，兼砥節首公之操。圖其宿望，屢煩方面之行，資厥老謀，嘗預幾庭之訪。比均勞典，還守本邦。曾是壯猷，亶無遺力，來謝時事，閔煩老成，俾參綺季之游，姑遂松喬之適。遽聞薨落，良用盡嗟。睠舊人之弗忘，挹餘芬之未泯，追加官傳之秩，增慰壙宵之靈。恩禮若茲，營魂尚識。《文恭集》卷二一。

故四方館使新州刺史王克忠可贈引進使遥郡團

練使制

敕：禁近之臣，嘗經於委使，哀終之典，當厚於追褒。以爾具官某，階胄緒之華，兼器幹之敏，歷更煩局，洊聘殊疆，虔使指以無違，奉官箴而有恪。晦明生疾，奄忽收神，短歷可嗟，愍章宜及。進升使範，參領軍團，庶榮厚窆之遊，尚識治朝之渥。《文恭集》卷二一。

故洛苑使任承亮可贈正任團練使制

敕具官某：褒恤信臣，匪常於邦典，追旌死孝，用篤於人倫。以爾行義修明，材謀敏劭。入祗禁奧，履謹畏而寡尤；外治劇煩，資恪勤而能力。侍承親疾，踰歷旬時，藥必務於先嘗，目曾無於交睫。因封其腹，遂隕厥躬，可謂殺身成仁，舍生取

義。在竭誠之足感，何與善之可疑！特厚卹章，用嘉純孝，褒進戎團之秩，申寵壙宵之遊。庶幾營魂，尚識恩禮。《文恭集》卷二一。

故文思使遂州觀察使史崇信可贈振武軍節度制

敕：親倚之臣，忽嗟於殲落，追褒之典，用究於哀榮。具官某，材則敏通，性惟謹質。給左右之事，能寡於悔尤；服內外之勞，克宣於忠力。方任能於宿衛，俄遭疾於晦明。奄至淪亡，良深悲慨。追用節旄之寵，申加印綬之榮，在恩禮而有殊，尚營魂之無忽。《文恭集》卷二一。

故莊宅使李希及可贈眉州防禦使制

敕：崇讓之風，以損己爲美，愍飾之法，用褒先曰榮。具官某，性蹈謹孚，行稱篤實，嘗歷近嚴之侍，屢更煩使之勞。享數弗融，殲良已久。生有慶靈之積，蔚鍾似續之良，續考以忠，在朕之右。請回遷秩之典，求贈乃親之官。美志可嘉，恤章奚愛，追升軍禦之重，集增使範之榮。尚歆予恩，往告而第。《文恭集》卷二一。

李懷贊可贈防禦使制

敕：奉使宣勤，既凝於前績，念勞甄往，宜責於厚恩。具官某，性本謹良，材惟幹裕，任乃居於親信，行則寡於過尤。遭疾晦明，收神冥漠。適予心之軫恤，覽而儼之控陳，進飭臺恩，追崇使範。惟稟靈之匪泯，尚禦侮之歆榮。《文恭集》卷二一。

贈虢州刺史种世衡可賜成州團練使制

敕：朕紀疆臣之勞，愍戎翰之逝，載加賁典，用洽至恩。具官某，深沉有謀，勁幹能力，屢奉典戎之寄，頗著憂邊之勤。館舍早捐，鼓鼙增愴。已伸刺部之贈，益峻團兵之名。魂而有靈，歆我茲渥。《文恭集》卷二一。

宋昱可贈供備庫使制

敕：某歸以廷臣，委之縣道。會五溪之雜種，掠數雉之孤城。能率官軍，出支賊黨，不幸遇害，遂隕厥躬。有嘉死事之忠，已舉錄孤之典。曲加贈禮，擢正使聯。恩足慰於墳冢，義亦矜於孝嗣。營魂有識，名秩是歆。《文恭集》卷二一。

故供備庫副使李隨可贈供備庫使制

敕：某素推溫謹，早侍禁嚴，出護外兵，甫還南服。屬嬰無妄之疾，遽興不淑之嗟。有懷恪恭，載深傷蠹，特推卹典，用正使聯。歆我漏泉之恩，慰而游岱之魄。《文恭集》卷二一。

鄧惟素可贈供備庫使制

敕某：恩以恤往者愛之殊，仁不遺舊者厚之至。以爾夙將謹力，逮事儲坊，奉頤旨而必恭，慎言樞而寡悔。援乃纂圖之慶，比參侍幄之華，尋遷隸於外庭，俾亞承於諸使。勤庸有積，命秩未優，遽聞喪逝之音，良軫蠹傷之意。特正名於使範，用紀績於銘旌。尚識納言，往歆漏澤。《文恭集》卷二一。

宋代詔令全集卷四四九

官吏拜罷

褒恤 二

曹利用立碑以旌功爲額詔

皇祐三年〔一〕

故魏國公智略沉雄，猷爲敏濟。會遇先帝，奮起奇才。久握樞衡，兼位將相。忠謀亮節，蘊在冊書。不幸遷罪，由於疑冤，廢死不以典禮。雖從昭滌，彌切悼思。訪宰樹之惟喬，顧豐碑之未勒，俾圖不朽，用賁英魂。特宜立碑，以「旌功」爲額。《宋大詔令集》卷二二〇。

故知封州殿中丞曹觀宜特贈太常少卿知康州贊

善大夫趙師旦宣特贈光祿少卿制

皇祐四年九月

十七日己未〔二〕

五嶺之表，面內以來，南連海澨，西屬蠻峒，未嘗有鳴桴之警。故守封之臣幸其無事，莫爲戰備。乃者獠衆猖獗，乘襲疆場。爾等并分符竹，對典州郡，當賊鋒銳，亡身徇國。嗟乎！城池不足以爲固，甲兵不足以爲衛，陷於非命，傷惻良甚。恤恩之厚，并貳卿列。汝其有知，承朕此意。《蔡忠惠集》卷九。

故侍衛親軍馬軍副都指揮使周美可贈忠武軍節

度使制

皇祐四年九月〔三〕

敕：國有利器，屬之虎臣。眷茲宿衛之勤，遭罹徂謝之變，特優愍綏，用渥終恩。具官某勇具有謀，忠而致果，早擢顏行之表，遂膺軍帥之選。頃者羌獷弗懋，鄙堡西聳，資爾戍戰，屢上功多，命典禁兵，人陪拱扈。方期強飯之適，遽有殲良之戚。悼爪牙之若奪，聽鼓鼙而增思，贈以陪京之節旄，加乎書昭之章綬。錫茲備物，允極哀榮。靈尚知之，享此追飾。可。《華陽集》卷三五。

故乾州安遠會昌縣巡檢□禁董玉等宜并特贈禮

賓使故賀州管界巡檢殿直趙允明等宜并特贈

南作坊使制〔四〕

敕具官某：國家設警巡之職，用以誅磔寇盜，撫安人民。

有能死其官者，朕當旌異，追進名爵，收錄子孫，所以表忠義也。蠻方猾橫，弄兵嶠外，爾等咸以忠勇，疾憤狂寇，擊刺襲躡，遭罹不幸。朕爲人父母，而使汝等身膏草野，妻孥望祭萬里之外，心焉哀惻，其何已耶！特寵使名，以慰幽路。靈其不泯，

〔一〕 皇祐三年：《宋宰輔編年錄》卷四繫此詔事於皇祐二年。

〔二〕 年月日據《續資治通鑑長編》卷一七三補。

〔三〕 年月據《續資治通鑑長編》卷一七三補。

〔四〕 「禁」上闕字當是「侍」字。

歆我嘉命。《蔡忠惠集》卷九。

故太子少師致仕任布可贈太子太傅制

皇祐四年

十一月二十七日戊辰〔一〕

敕：朕惟君臣之際，見始終之分，故生而忠瘁於朝，沒則寵賁其第。矧股肱之喪，而邦國所悼，宜篤大義，以隆恩體。具官某才器沈裕，志識純正。以碩德重望，屢屬方面之寄；以奇謀嘉論，嘗參幾府之務。適斬辟於時柄，遽願還於榮紱。荐歷華歲，緬懷清風，忽聞訃音，良用震念。眷其臺路之舊，襚以宮傳之秩。營魂有知，歆我渥命。可。《華陽集》卷三四。

故廣惠等八州沿海都大捉賊西京左藏庫副使武

曰宣宜特贈忠州刺史制

敕具官某：綏懷之德，不及蠻獠，至使拔其種類，寇鈔嶺外，徑趨清海，鋒氣尚銳。爾惟邏巡之職，實司翦捕，而能忠果挺志，勇毅自奮，身先士伍，轉戰不已。兵力失利，歿於鬪格。遠聞予聽，終夕悼惻，特推恤典，列於刺部。忠魂如在，歆此哀寵。《蔡忠惠集》卷九。

廣南西路鈐轄下捉殺故奉職蔣用和宜特贈內殿

承制指使三班差使張亢等宜并特贈內殿崇班

制

敕具官：有生而死，磨滅者衆；爲忠魂蒙烈，雖沒不忘，

宋代詔令全集卷四四九 官吏拜罷 褒恤 二

汝等參於裨校，往捕寇攘，矢石之間，殞其軀命。朕心哀愍，特優恩恤，追榮近墀，賁終幽窆。冀爾靈魂，享是嘉寵。《蔡忠惠集》卷九。

故賀州司理參軍劉冕宜特贈左贊善大夫故英州

攝官李積宜特贈光祿寺丞制〔一〕

敕：具官某等并爲嶺外州縣之吏。屬以蠻峒猖獗毒我列郡，恃兵跳梁，殺辱紳笏。汝等并懷忠節，捨生不屈。朕惻然義之，特行哀恤，追褒官窆，榮贈宗司。靈其歆之，良慰汝志。《蔡忠惠集》卷九。

秘書丞范純仁父仲淹贈吏部尚書制

朕親執圭瓚，昭見祖考，還御端門，發號施慶。昭天漏泉，恩靡不逮，誠欲慰士大夫立身揚名，奉先追遠之思，況王室舊德，功在盟府者乎？某，英亮特達，宏正深雅，文學自奮，忠義事上。故人贊機政，出董邊師，朝廷以尊，戎狄畏之〔二〕，可謂股肱心膂，大臣之表矣。不幸早世，棟折梁壞，盡然傷之，至今不忘。聞其有後，庶能濟美。夫積善必報，顯親無遠。追命之典，自春秋固行矣，苟可以旌忠臣之節，申孝子之感，豈非崇勵風教，通於神明者乎？其以天官冢卿，告其封禪。《公是集》卷

〔一〕 年月日據《續資治通鑑長編》卷一七三補。

〔二〕 劉冕：宋本作「劉冕」。

〔三〕 戎狄：原作「四裔」，據明抄本、鮑本改。

三〇。

故廣南東路鈐轄蔣偕可贈武信軍觀察留後制

敕：自古英偉之士，死而寂寥者衆矣。惟忠義之節，雖沒而不朽，況離金革之禍哉？具官某勁特之氣，毅然許國。蠻方不憚，俾爾南戮。受命之日，晝夜兼行，盛夏瘴熱，冒履山險，轉鬪之際，遭罹非命。朕之不能綏格遠夷，使爾捐驅萬里之外，終夜哀悼，予心曷已！其以兩使之襚，寵於幽窆。英魂如生，欽此追飾。可。《華陽集》卷三五。

故荆湖北路駐泊都監孫節可贈忠武軍節度觀察

留後制 皇祐五年二月二十四日乙未〔一〕

敕具官某：夫受命志身，奮力犯難，殞於兵間，勇以立節者，固可錄也；致果殺敵，冠軍爲鋒，雖死王事，因而成功者，尤足褒也。不有旌飾，孰明忠義？具官孫節氣稟剛烈，雄能戰鬪。將荆禁之旅，征南之軍，掩擊群蠻，首先行陳。踰崑崙而西，歸仁之下，斬獲過當，寇遂以奔。刺伐不休，傷夷而歿，全師賴之，進而克捷。總帥具聞〔二〕，用加祭諡。舉兩使之留印，賁九京之英魂。是惟報勳，尚必欽服。可。《華陽集》卷三五。

封州司理參軍林詢被蠻賊殺害贈大理寺丞制

頃者盜起南服，震驚朕衆。汝掾州郡，遭罹非命。盡忠隕首，誠節可尚，識刑之秩，用賁幽窆。《蔡忠惠集》卷一〇。

故秘書監胡旦特贈工部侍郎制 皇祐五年閏七月七日甲戌〔三〕

敕：治道出於人文，惟儒者爲能通而行之，故世主右賢，以風天下。國家發揮神化，招徠樸茂。挾經術，談詞章者，脫巖野而都卿相，生享顯榮，歿有襚贈，可謂重矣。具官某，該貫百氏之言，而藻思雄贍，首中科選，旋升禁掖，以材自名，聲蓋人上。秋逸之驥，蹏蹏中路，晚以病退，著書見世。今聞嗣續彫落，旅魂未安，已敕守臣給辦喪事，仍以文昌貳卿申賁泉壤。嗟爾不泯，其少慰哉！《蔡忠惠集》卷一〇。

三司使禮部侍郎田況祖行周可贈工部員外郎制

敕：朕承神之尊，以反物始之報，迺己已景至，帝臨中壇，神靈冥嫉，光照紫幄，對越三后，孝心永孚。亦惟爾一二侍從之臣，相祠在下，而霜露之怛〔四〕，可不慰爾之思？今加襚二廟，厥惟寵數之隆。具官某祖某，風德修潔，行義衝固，懷材弗耀，載世而昌，孝孫維賢，管我邦計。夫道隆者其爵重，積厚者其澤深。文昌起司，賁以優秩，九原雖邈，不顯其承。可。《華陽集》卷三六。

- 〔一〕 年月日據《續資治通鑑長編》卷一七四補。
- 〔二〕 帥：原作「師」，據殿本改。
- 〔三〕 年月日據《續資治通鑑長編》卷一七五補。
- 〔四〕 怛：原作「恒」，據殿本改。

故入內侍省都知張惟吉可贈昭信軍節度觀察

留後制

敕：左右近侍之臣，生而親倚之，沒也念哀其勤勞，蓋有以加襁者，豈常典邪？具官某動則忠懇，言而端慎。自總內宰之治，迨兼衆職之領，氣和而益衝，材敏而畢給。方厚予信，歎嗟云亡。宜寵留鎮之章，往詔京阡之窆。尚懷謙靜，來顧恩華。可。《華陽集》卷三五。

贈昭信軍節度觀察留後張惟吉可贈保順軍節度

使制

至和元年十一月〔一〕

敕：夫生而盡忠於公者，時所謂賢；沒而疊恩於第者，禮不爲過。其有歷左右之侍，罄夙夜之勞，加惠其亡，庸申予悼。具官某性質和厚，材質幹明，周旋四紀之餘，始終一節之守。自聆捐舍，已促琢章。有懷忠言之如聞，猶慮寵數之未稱，追用將旆之拜，尚榮原宥之游。華渚非倫，營魂是享。可。《華陽集》卷三五。

贈六宅使王永吉可贈高州刺史制

敕某：朕常思嶠南之戰，有仗義死節而褒或未至者。今使者列爾向離難虞，賊屈不拜，毅然秉色，至捐軀命，不有旌顯，何以勸忠？州刺刻章，再飾爾隧，庶夫英憤之魄，識予哀寵之厚。可。《華陽集》卷四〇。

故右班殿直陳孝先可贈南作坊副使制

敕某：日者遠蠻背恩，旅拒篁竹之間，寢以稽戮。爾憤疾

狂寇，奮不顧命，勢寡力迫，離於賊鋒。朕嘉死事之節，特厚恤終之典，命諸介使，寵於忠魂。可。《華陽集》卷四〇。

故果州團練使劉永世可贈汝州防禦使制

敕某：國家褒良臣，則有飭終之典，寵近戚，則有憫存之禮。以爾承高門之緒，服諸使之聯，材未克施，命奄不淑。適念母慈之請，重言肺附之親，特綸省之下書，俾兵防之加襁。歆茲異澤，賁於幽途。可。《華陽集》卷四〇。

故西上閤門使知雄州李緯可贈陵州團練使制

敕某：夫生履顯位於朝，沒則加褒襁於第。若夫與班於材武，摩力於疆陲，忠瘁所形，恩禮宜異。以爾器懷端厚，風尚沉雄，介馬馳於邊勞，詩書輔以帥略。方倚謀於閫要，遽興愴於朝晞，空見金城之圖，靡及玉關之人。特峻陞於廷引，兼遠視於兵團。緬惟英魂，歆我閔惠。可。《華陽集》卷三九。

〔一〕 岁：原作「夕」，據文意改。

〔二〕 年月據《續資治通鑑長編》卷一七七補。

供備庫副使李誨父皇任鎮潼軍節度觀察留後贈

感德軍節度使兼侍中端懿贈司空兼侍中制

敕某：朕有釐事於上神，而幽顯并蒙其福。具官某父某，

繼承德義，被服文儒，出入踐更，有榮爵祿，能以才業，自昭於時。壽善不兼，慶流厥子。追崇位號，尚克知歆！可。《臨川先生文集》卷五四。

武勝軍節度觀察留後王凱贈節度使制

敕：將帥之臣，出乘疆場，而有執敵捍患之材，入總營屯，

而有折衝銷萌之用，則序功錄德，當以厚終。以爾具官某，戰攻之多，守衛之最，有賞於國，有稱於時，而能悉心夙夜，祇慎厥職。不幸至於大故，朕用臨弔而悼焉。其追加一命，使得建節樹纛，稱其綏葬之禮。沒而有知也，尚能享吾休顯之報哉！可。

《臨川先生文集》卷五四。

故崇儀使康州刺史內侍押班盧昭序贈正刺史制

敕某：所居之地禁，所事之職親，恩禮所加，亦宜異數。

爾以忠力，備任宮闈，歷年滋多，率履惟謹。今其亡矣，追惻厥勤，考於故常，當得褒序。遷正位號，尚能知榮！可。《臨川先生文集》卷五四。

故內殿承制宋士堯等贈官制

敕某等：蠢茲蠻方，犯我邊吏，爾等以身死職，朕用哀恫。

夫見危授命，士之美行；褒善錄功，國之令典。故吾有以愍錫，而慰爾等奄窆之靈。沒而有知，其尚能享！可。《臨川先生文集》卷五四。

都官員外郎何若谷亡兄若冲追贈試大理評事制

敕某：爾躬率善行，而不克自昭於時。有弟在廷，法當增

位。固辭恩典，冀得追榮。愍錫一官，尚其能享！可。《臨川先生文集》卷五四。

孫沔特賜兵部尚書制

治平三年四月

敕：夫引年以禮，謝事乎朝，許國未忘，聞命則起，朕固

知爾之忠。及其從事金革，感疾晦明，淪亡道塗，恫傷士卒，朕是知爾之命。恤章告第，詎可忘哉？故觀文殿學士、金紫光祿大夫、行尚書戶部侍郎、上柱國、安樂郡開國公、食邑二千一百戶、食實封三百戶孫沔，逮事先朝，洊更顯仕。舉通治術，文飾吏方。憲府諫垣，嘗聞正論。漕軍州桀，並著茂庸。以至更治西秦，收功南粵。延登有密之地，寔爲輔弼之臣。而懇借郡章，旋還政事。朕以關陝用兵之最，延安謀帥之艱，再命爾行，期畢予事。天胡不憖，今也云亡。訃音上聞，朕心震悼。惟文昌八座之貴，夏官七兵之崇。刻於密章，尚賁泉壤。營魂不昧，其克歆承。可。《宋大詔令集》卷二二〇。

（一）可：原無，據應刻本、繆氏本補。

屯田郎中知筠州董儀亡兄俛可贈試大理評事制

敕某：爾之弟儀不忘訓撫之恩，納所當還，以易贈典。朕嘉爾之能友其弟，而儀之所為協於悌順，故以理官之秩加責泉隧。尚有知者，其榮享之。可。《南陽集》卷一七。

故內侍省內東頭供奉官李用希可贈供備庫副使制

敕某：謹信自持，勤篤匪懈。被恩未拜，遭命不融。嘉乃似續之言，錫茲賁褒之典。升貳使領，足慰爾魂。可。《南陽集》卷一七。

觀文殿學士知杭州胡宿可贈太子太傅制

柳莊死，衛侯脫祭服而禭之，君子謂之親賢。況夫舊德之老，嘗輔先帝，彌綸萬幾之業者乎？宜申顯命，以極哀榮之典。具官某秉忠履潔，白首不逾，邃謀密議，臺臺而荐。至擢貳樞管，膚公參乎帝載，而雅操素尚，蕭然自遠，懇解繁務，得請吳藩。庶乎湖山之樂，足以資靈氣而毓眉壽。如何不淑，遽委大化而去，朕甚痛之，得無褒賁以慰其已沒！密章綢綬，春宮道德之傳，用以告第，不侈於柳莊之禭乎！可。《鄭溪集》卷五。

樞密直學士兵部郎中知秦州蔡抗贈禮部侍郎制

孔子哭舊館而哀，遂脫駟馬以賻之，蓋夫感深則哀至，哀至則賻厚。而予有雋艾之老，遠歿乎秦隴，如之何不撫几投餐，惻

怛而零涕，優申禭典以寄長懷者哉？具官某高才經務，有匪躬之節。先帝初潛，傾屬已異，遂攀日月，矯翼而橫飛。曩以上邦謀帥，仗鉞西行，號令隱然，見漢將之風采。方資碩畫，共弋王家，維天不弔，奪之太速。夫先帝之所咨謀，可謂舊德矣；予聞其喪而傷之，可謂哀盡矣。特禭以小宗伯之秩，不為賻之厚乎！然而孔子之志，予竊取之矣。可。《鄭溪集》卷五。

優給呂溱後詔

熙寧元年五月十五日(三)

樞密直學士、給事中呂溱立朝最孤，知事君之節，絕跡權貴，故中廢十數年，無人肯為達之者。朕近擢領要務，頗著風績，今忽淪亡，甚可嗟悼。又溱素家貧，一子幼騃，遭此大禍，必至狼狽。可令有司比本官常賻之外，量與優給，及一行葬事，官為辨集，庶示將來，以勵臣節。仍令屯田郎中、新知秀州張次立管勾葬事，令揚州借官舍居住，候服闋依舊。《宋會要輯稿》選舉三二之一四。

唐介贈禮部尚書制

熙寧二年五月(三)

敕：衛失柳莊，猶曰雖祭必告，唐哀張僅，亦云辰日無避。況荐紳之望，時惟老臣，股肱或虧，予所甚悼，庸申愍冊，以告泉壚。給事中、參知政事唐介，文足以謀治體而經遠猷，武

(一) 哀：原作「褒」，據夏本、潘本、四庫本及院抄本改。

(二) 十五日：《宋大詔令集》卷二二〇繫於「甲申」即十三日。

(三) 年月原無，據《宋會要輯稿》儀制一一之三補。